



QUÆSTIO MEDICA.

CARDINALITIIS DISPUTATIONIBUS

manè discutienda in Scholis Medicorum, die Jovis

decimâ-septimâ Martii.

M. CLAUDIO QUARTIER, Doctore
Medico, Præside.

An vinum ad tabem pulmonis vergentibus perniciosissimum?

I.

INIQUIS Ille conditionibus lucem accipit, quisquis corpus causarium, & è recto sanitatis tenore deflezens, à Naturâ sortitur: vitam quippè ducit acerbiorē, si hæc, quâ tunc vivitur, vita dici potest: Luctatur perpetuò cum hujusce vitæ malis; facile rerum externarum occurſu percellitur: hunc sæpè dolor, quasi prænuntians temporum aut cæli mutationes, fragilem & tenerum ferit, quibus bene natus, & meliore luto fictus minimè tangitur: ob levissimum victus errorem, ructibus & flatibus concutitur, cruditates plurimas cumulat obstructionum & putredinis parentes, quibus succedit per annorum seriem cohors febrium multiplicis generis, quæ corpus malè validum duriter exercent, pariuntque symptomata creberrimè causarum naturam induentia. His castigandis affectibus vitam tenetur degere desidiosam, quæ calorem nativum inertiorē, spiritus ad omnes sensus & naturæ opera se-gniores reddit, corpusque universum ignavius languidius & debilius factum, impar est ærumnis hisce sustinendis, quæ sic affectum circumveniunt, nisi subscribens Medici salutaribus institutis, ea omnia quæ tum in cibo tum in potu vehementer movere aut accendere spiritus & sanguinem, aut tabem inducere queunt, aut ullo alio modo nocitura declinet.

II.

ΦΘΙΣΙΣ, seu tabida pulmonis affectio, adolescentibus æquè ac juvenibus supra ceteros familiarior est, quos eâ ætate licet felices clanculum adoritur: hac semel lue corpus inquit

natum emacrescere in dies conspicitur usque ad interitum, maxime cum ab hujus partis ulcere fovetur. Comitem semper habet febrem hecticam quavis aliâ febre majorem, quæ tacito veniens gradu, non cor dumtaxat, sed & cæteras universi corporis partes hostiliter occupat: tangenti molestus calor iste febrilis persentitur, qui paulò post pastum noctuque frequenter, pati solet exacerbationes, quibus curandis hæcenus in usum adhibitus inutiliter fuit peruvianus cortex: importuna tussis affligit ægotantem, difficilis spiratio fatigat, sitis crebrò urget, dejicitur appetentia, alimentum sustentandis partibus corporis non amplius retentum, malè coctum & tandem viciatum per se diffluit, perturbatis in suo officio visceribus quæ apparant cibos: horum substantiæ ut & solidarum partium corporis fit dissipatio: hæc ciborum benigno rore defraudatæ, junceæ redduntur, scabritie vigente curvantur ungues, cavantur oculi, eliditur quoque in faucibus spiritus, vox per intervalla aliquando diuturna extinguitur, anima fœtet, alvi fluxus succedit, mali semper ominis: Demum summo pædore deformatum, & in eas adductum angustias, non hominem diceres, ossa & pellis totus est, in quem adeo indignè & *ἡνελωδὸς* sævit illa pestis, cujus nomen, ideam, contagionem, eventum fatalem omnimodè implet, & pulmonis sic affecti summa imbecillitas, mollities, jugis motus, textura rarior, auxiliorum aditus, omnia ad curationem difficillima reddunt, unde huic semel eâ labe infecto, vix spes ulla salutis relinquitur.

III.

PULMONIS ad vitam summam esse necessitatem, extra omnem est controversiam, cum idem sit spirare ac vivere. Respiratio est actio merè naturalis, pulmo est aëris officina, acta simul agensque vicissim: subit pulmones aër a gravitate; à vi elasticâ eos expandit, a fluiditate sanguinis partes singulas commovet & exagitat, miscetur cum sanguine, eumque fluidiorem reddit, & circulationem ejusdem non parum faciliat. Turgent pulmonis vasa sanguine copioso, unde morbi omnes pulmonum curantur larga & liberali sanguinis detractione, quos hujus defectu non sanant hæmophobi. Qui proni sunt ad pulmonis tabem, id habent nonnulli ab ingenito quodam partis hujus vitio quod à parentibus contraxerunt tabida stirpe satis: alii ob thoracis angustiam & depressionem, scapulasque in modum alarum prominentes. Hinc pulmo contractior continuò fit obnoxius humorum decubitus, in quo frequentiori casu per vasorum seriem humo-

ris acris & exedentis, vestigium tabidum imprimitur. Istorum in eo facilis fit tum apertio tum ruptio, orta ex cursu præcipiti, vomitu violento, improvise casu, ad quas causas accedens calidior halitus ex partibus infimis secundum tubulorum ductus, caput impetens, viscerum malè moratorum vigens intemperies, quam fovet insolens victus ratio, calidiorum ciborum & potuum usus, aëris vitium, qualem præsertim hauriunt ii qui in fodinis vivunt, & fornacibus addicuntur, occasionem præbent huic affectioni tabidæ quasi ex occulto & per insidias advenienti. Sic autem constituti valetudinarii sunt, febribus opportuni, hos sereni vultus foedatio turpat, languor comes est, In progrediendo tarditas, corporis universi gravitas, lassitudo fere inexpugnabilis. Si quoque hominem videas, pallentem, tussientem, nihil penè expectorantem, anhelosum, plus solito gracilescens, facile conjicies hoc corporis habitu, non obscura φθίσεως rudimenta designari, quam citò adventantem auguraberis.

I V.

VINUM dulce in infantia, mustum vulgò dictum, succus est uvis expressus, fervendo simul fermentescendoque coctus atque defecatus; hominibus habetur in delitiis, ob divinas ejus doctes passim & ubique decantatas, si Turcarum gentem excipias, nullo in casu stolidiorem, quam cum ab illo pretioso Naturæ dono se continet, & calidum opium usurpat familiariter multo perniciosius, graviter certè in hoc cæcutiens, nulloque rationis lumine ducta, quæ benè adhibita docet atque explanat, quid faciendum fugiendumque sit, ut ne, dum palato servitur, aut valetudo nutet, aut malè mens suum faciat officium. Suavis ille liquor primas tenet inter potuum genera, quos salubritate omnes superare perhibetur: pro nutrimento est, faciem efficit ciborum distributionem, & naturam per vias debitas ad supervacaneorum excretionem mirum in modum sollicitat, spiritus dissipatos reparat, cor exhilarat, vividum floridumque faciei colorem inducit, suoque demum potores & potrices innumerabilibus beat bonis. Sed cave ne vincat vinum quod bibis: ejus noxas vites: sæpe leviter blandiens, hostis infensus vitæ tuæ parat insidias; Solet nempe caput tentare, & mentem è solio regio deturbare, infinitaque alia parere mala, nisi in hujus potu servetur modus. Id juxta sui crasim sanguinem calidiorem acrioremque gignit, suo ingenio respondentem: calorem possidet à calore nostro non parum alienum, blandus etenim est calor ille nostras genuinus, benignus, servator,

vinī calor igneus, vorax, populabundus, & ob eam vim promptè subit ac penetrat interiorum viscerum recessus abditiores, eaque ut incendiarius vastat, inflammat, exurit, & brevi summæ intemperiei iis inusta author occultus & hospes infidus agnoscitur.

V.

CAUT A est ritè Medentis meditatio, qui naturam ægrotantium explorat, ipsosque quid amplectendum, quid vitandum amicis verbis commonefacit, ut se ab impendentibus vitæ suæ molestiis vindicent. Ad ea quippe consilia attentissimi debent esse, qui proclives sunt ad pulmonis tabem, ut causam ejus remotam licet, haud quamquam promoveant. Ea igitur seriò vitent quæ sanguinis sreatum exrupta, aperta aut exesa vena provocare possunt, vehementiores nempe animi contentiones, ejusdemque immoderatos motus, valentiora quoque corporis exercitia, cursum citiorem, venerem, ingluviem, crapulam. Vinum inter omnes potus abhorreant ut venenum, quod æstum viscerum, & sanguinis fervorem auget, caput infirmum reddit, & catharris opportunum, tussiculam proritat, raucedinem parit, à quibus tabis initium derivari divini Senis oraculo pronuntiatum est; quibus si accedat vitiosa capitis structura, *πνεύμα* perseverans, tum ex eo fonte, tum ex malè constituto corpore contractum, infesta hæc tabes tanquam pessimus fructus à malè confito seminario & fundi calamitate sobolescat. Ne igitur suæ hi salutis proditores sint, cum iniquissimo potus genere pravam istam luem jamdiu silentem, & cineri dolofo suppositam exsuscitant. An miserè vivunt, quibus ex ea vini abstinentia deest ea voluptas & suavitas, quæ in hujus haustu percipitur? An verò miserius? qui ex hujus usu gravissima mala incurrunt, & occæcati cupiditate molles & voluptarii, in tabidum affectum se præcipitant, cujus quævis penè inveterudo comes est: sic malo suo fato meritas infastæ voluptatis pœnas luunt, cui succedit fatalis vitæ meta, quam non accepisse breviorē censebuntur, sed fecisse.

Ergo vinum ad tabem pulmonis vergentibus perniciosissimum.

Proponebat Parisiis CLAUDIUS VERGNE, Montargianus, Baccalaureus Medicus. A. R. S. H. 1701.

Apud Franciscum Muguet, Regis & Facultatis Medicinæ
Typographum.